

De Ausreißer

E klääna Bub, unerfahre unn dumm,
gedd uff Entdeckung aus.
Er laaft dursch de Gaade, um's Haus erum,
iwwa die Wies, gonz weit enaus.

Die bunde Bliemscha logge ne ohn.
Die Veschelscha, wie scheen se peife!
On de Mamme ihr Warnung – do denkt er nit drohn.
Er duud's jo aach noch nit begreife.

Der klääne Knirps, er schpringt vagnieschd,
guckt nit emol zerick.
Sei Elderrehaus is außer Sicht.
Doch dofor hat er jetzt kenn Blick.

Er breschd e Bliemsche unn sitt grad:
Do sitzt e Biensche druff!
Hat nit de Oba mol gesaht:
"Die stesche, Kneschd, pass uff."

Mit em Fingersche will er's ausprobiere.
Auwei, was war donn das?
Jetzt kann er selwer es vaschpiere:
Die Warnung vumm Oba war kenn Spaß.

Oje, oje, wie weh das duud.
Vorbei die Luschkunn die Frääd.
Vunn ääner zu der onner Minudd
issem sei Ausfluch valääd.

Die Sunn is gar nimmeh so hell,
die Veschelscha sinn jetzt schdumm.
Er drährt sich runderum uff da Schdell.
Woher bin ich nur kumm?

Quack, quack - was huppst dort aus da Heck
for e hässlich Vieh in die Heeh?
Die Drähne kumme ihm vor Schreck.
Sei Händsche duud so weh.

"Isch will jetzt hemm!" kreischder nur noch.
Er rennt - wääß nit, wohin.
Sitt nit uffem Boddem das große Loch:
Fallt uffem Bauch dort eninn.

Jetzt brillt er awwer lauthals los.
Er denkt drohn, was die Mamme ne gelehrt:
„Geh longsom, fawas rennschd du bloß!“
„Ach hätt isch doch uff se geheert.“

Do schdedda - alläään uff weider Flur.
Dohinne sitt ma schunn de Wald.
„Däht isch doch de Hemmwääsch finne nur!“
Er is mied unn hat aach aarisch kalt.

Jetzt fallem "Hänsel unn Gretel" inn.
Wie war das doch bei denne zwei gewähn?
„Es wird doch nit hie e Hex noch sinn?
Ach, was bin isch so alläään!“

Dick wie e Dompnudel sei Herzje schunn is;
doch enns hat de Knirps jetzt kabbiert:
„Wär isch dehemm nit ausgeriss,
wär mir das do nit passiert.“

Awweil ruft doch jemond laut sei Nome.
Em Babbe sei Schdimm! Ihm is klar:
Was jetzt kummt, das konner schunn ohne.
Heit war fa ihn kenn glicklischer Dah.

Helene Keller

